



Su retratu tonaresu

Tzertu mi diat essere agradau
a andare a Tonara a abbisitare
cumpanzos de iscola e salutare
ca una borta m'aiant retratau
in-d-una corte e m'aiant mudau
a costumene issoro singulare.

Cando l'apòmpio sa fotografia,
mi parzo una pitzinna tonaresa:
mucadore, abratzeddu a trintza presa
e tzipone e camisa de balia. ..

Paret chi inìe deo siat naschia,
a paletas e chinta. .. Ite bellesa!

M'ammento bighinados, ispuntones,
zirande che turistas rie-rie
e faghende retratos die-die
a càntaros e pratzas e pessones,
a cresias, campaneddas e turrone
e a castanzos e a montes de nie.

Impare a un'amiga istimada
nd'aio tentu bona cumpanzia!
S'edade de sa mea pitzinnia
in su retratu l'apo sizillada
in sa bidde 'e Mereu poetada,
e cun versos de rima a galanìa.

Pustis de chimbant'annos e prus fatu,
mi benit a disizu e cun ispera
de abbistare a cudda carrera,
a cudda domo de cuddu retratu.
E a su cuncursu sardu ponzo infatu
cun sa fotografia a galavera.

Ma... prima li fago un'ingrandimentu
e l'apico in sa sala pro bellesa,
e gai, cun simpatia in sa betzesa,
li miro sos colores cun apentu.

E cun sa Musa canto in s'aposentu
cun sa boghe de s'anima in artesa:

- Ti declaro, Tonara, in poesia,
cun piaghère mannu e sentimentu
chi a sa cultura tua lasso un'ammentu,
unu retratu de sa vida mia-

Maddalena Frau